

中華民國七十六年六月臺一版

清詩話訪佚初編 (六)

精裝一冊基價 一二・〇元正

版權



所有

主編者：杜

松

發行人：高

本

發行及印刷所：新文豐出版公司

劍柏

公司：臺北市雙園街九十六號
電話：三〇六〇七五七・三〇八八六二四
門市部：臺北市羅斯福路一段二十號八樓
電話：三四一五二九三・三四一五二九四
臺北郵政三六四三信箱
登記證：局版臺業字第〇六四九號
郵政劃撥：〇一〇〇四四二六號

清詩話訪佚初編

(六)



十二石齋詩話十卷自卷四至卷十……………清梁九圖撰……………○五三七—一五六

十二石山齋詩話卷四

順德梁九圖福草

職方外紀西人言繞地過一周四匝皆生齒
所居是地形本圓也陳泗源謂東西測景
有時差南北測星有地差皆與圓形相合
是地方之說非也然鮮見於詩南海何報
之夢瑤咏云地形如懸毬天樞如轉軸循
環無端倪團圞相攢簇氣周物亦遍附地

億萬族上下無定名眾輻輳一轂各自上
其首各自下其足此疑彼倒懸彼謂此橫
屬何處爲四夷何處爲中國偶爾有梁魏
妄自爭蠻觸伯翳著山經地下人不讀

村塾小兒讀書率多大聲狂叫聒耳不堪秀
才家讀時文往往如此每不惜氣竭聲嘶
而不知其有損無益也余最愛誦彭忠肅
龜年讀書吟示子鉉云吾聞讀書人惜氣

勝惜金纍纍如貫珠其聲和且平忽然低
復昂似絕反可聽有時靜以默想見紬繹
深心潛與理會不覺泳歎淫昨夕汝讀書
厲響驚四隣方其氣盛時聲獨亂狂霖倏
忽氣已竭日亦遂絕吟神疲神自昏思慮
那得清安能更雋永溫故而知新永歌詩
有味三復意轉精勉汝諷誦餘且學思深
湛又唐盧仝寄男抱孫詩亦云尋義低作

聲便可養年壽莫學村學生麤氣強叫吼
味此二詩可得讀書之法矣

鎮洋沈方立孝廉端與弟安成俱有詩名其
送弟之山左云家貧無舊業所至輒依人
難得故鄉聚况兼多病身薄游增意氣行
路飽艱辛老輩吹噓力還期汨沒伸臨別
不能語離魂黯自傷持家無健婦掩涕爲
高堂骨肉偏分散關河正渺茫殷勤囑杜

字催汝早還鄉覺真情真性溢於楮墨之閒

紫竹山房集云文生于情而文足以達情者莫過於詩言情之詩又莫善於近體篇止五十餘字境窄則難以旋身韻忌用險怪字字少則難以副意有能稱意以出旋身自如而又兼節奏之妙如古之作者落落不過數人七言律之難如此

吾邑簡夢巖鈞培所著覺不覺軒詩鈔頗多
佳句如云情當久客原多感事到隨人便
覺難又小雨樹無將落葉輕寒菊有未開
花皆工至河南雜興絕句云清波宜月復
宜烟留得遊心夕照邊待種千條萬條柳
半藏鴉影半鳴蟬丰神尤屬綽約

王漁洋秋柳四首和者如林錢蔣石宜亭新
柳六首論者謂可與之頡頏而和者尙少

余戲和之有一樣鶯聲百樣懷句鄭雲麓
年丈謂語妙不可多得稿爲友人攜去記
憶不全今猶怏怏焉因記簡夢巖句云興
來景物頻拈得亡去詩篇欲補難洵不誣
也

沈方舟爲紅蘭主人客其室人朱道珠遙寄
故鄉山水圖主人作詩有應憐夫壻無歸
信翻畫家山遠寄來方舟旋歸當時傳爲

佳話然余讀道珠寄遠曲云恨少垂楊柳
殷勤繫玉鞍夕陽鴉背煖春雪馬蹄寒入
世逢迎拙依人去住難痴兒啼向我昨夜
夢長安獵獵風初勁沈沈雨未闌因憐兒
被薄轉念客衣單棲燕將雛苦征鴻失侶
寒居家與行路同是一艱難聞說燕臺路
生涯亦可憐恥彈門下鋏誰乞廣文錢久
客非長策歸耕有薄田一棺痛慈母急爲

卜牛眠則方舟之歸非盡一畫之力矣

方舟母柴靜儀亦能詩其勗用濟云君不見
侯家夜夜朱筵開殘杯冷炙誰憐才長安
三上不得意蓬頭黧面仍歸來嗚呼世情
日千變駕車食肉人爭羨讀書彈琴聊自
娛古來哲士能貧賤一門風雅足令千秋
艷羨

詩用古人姓名能渾融無跡亦可免點鬼簿

之譏如陳雲伯書平海紀畧詩後云鈴聲
久識甘興霸劒術爭傳聶隱娘張茶農題
宋高宗中興應瑞圖云艱危國勢同元帝
參錯天心負九哥秦留仙松齡雜感云屯
邊戍久推充國納土功甯比竇融荆南春
日感懷云登樓有客依劉表使粵柯人下
趙佗嚴修人允肇諸將雜感云不信崩通
能相背可無孫武善攻心漢廷却悔封雍

齒巴郡終須殄隗囂王文恭公頊齡喜湖
南諸路大捷云百粵風烟通馬援入公草
木走苻堅早擒孟獲趨滇水急斷盧循入
廣州張厯友篤慶明季詠史云顧厨品藻
矜名字牛李升沈密網羅陽球尙未尸王
甫曹節偏能殺李膺南還不少黃潛善畱
守空爲宗汝霖空餘跋扈桓宣武豈有勤
王溫太真湖北金豫齋檢討德嘉云酒邊

歲月陶元亮詩裏乾坤杜少陵途窮阮籍
狂呼飲天放虞卿老著書山東馮大木廷
櫬云范叔漫言天下士杜陵空望眼中人
折腰未敢攀陶令攘臂何須笑晉人海寧
查初白慎行云田橫客已辭窮島樂毅功
難敵謗書鮑叔有情貧敢諱向平多累出
偏遲曹儷笙太傅詠司馬相如云才子同
時誇武帝美人知已有文君阮芸臺相國

云閉門豈是陳無已懶讀將同邊孝先驅
使處但覺呼吸通靈余亦有贈馬訓庭都
督句云滿座賓朋孔北海四時絲竹謝東
山

花田詩多風流旖旎惟湘潭張紫峴九鉞咏
云誰知萬古塚中魂飛作三更頭上雪鮮
有如此奇崛者其登采石謫仙樓放歌云
借我峨眉萬古之明月照我長江萬里之

孤舟醉我樽中千斛之美酒坐我青天百
尺之高樓起勢笑兀聞爲十三歲作更奇
人壽固難而五代同堂者尤難乾隆間 命
彭元瑞等檢四庫全書古來見元孫者有
幾據奏自唐迄明凡六人彭有誌事詩云
六逢唐宋元明代疊衍來舅仍耳人

無錫秦小峴侍郎司臬吾粵時潔已愛民公
餘仍耽吟咏招邀賢俊屢爲詩酒之會一